



Broj/Број: 01/2a-50-1-2-37/09
Sarajevo/Сарајево, 28.01.2009.godine

ZAPISNIK

37. sjednice Povjerenstva za vanjske poslove Predstavničkog doma Parlamentarne skupštine Bosne i Hercegovine, održane 20.01. 2009.

Sjednica Povjerenstva je počela u 11.00 sati. Sjednici su prisustvovali članovi Povjerenstva: Slavko Matić, Azra Hadžiahmetović, Milica Marković, Milorad Živković, Husein Nanić, Azra Alajbegović, Sadik Ahmetović i Sefer Halilović. Sjednici nije prisustvovao Denis Bećirević.

Osim članova Povjerenstva sjednici su prisustvovali i Arna Ugljen-Kopić iz Ministarstva vanjske trgovine i ekonomskih odnosa BiH, Biljana Čamur i Suad Džafić iz Ministarstva civilnih poslova BiH, Bejta Ramović iz Ministarstva finansija i trezora BiH i Sead Avdić iz Ministarstva vanjskih poslova BiH.

Zapisnik su vodili Merdžana Iglica sekretar Povjerenstva, i Miroslav Stanišić stručni saradnik u Povjerenstvu za vanjske poslove.

Predsjedavajući Slavko Matić je na početku pozdravio prisutne članove Povjerenstva za vanjske poslove i predstavnike Vijeća ministara BiH. Pošto su se na sjednici pojavili novoimenovani ambasadori BiH dogovoreno je da se sastanak sa njima održi nakon sjednice Povjerenstva u 13. sati.

Slavko Matić je na početku sjednice predložio da se tačka 6. dnevnog reda "zamolba za prijem grupe šefova diplomatsko-konzularnih predstavništava" skine sa dnevnog reda pošto je dogovoreno da se sastanak sa ambasadorima održi nakon sjednice Povjerenstva, kao i tačka 4. dnevnog reda "rasprava o mišljenju Vijeća Ministara BiH o dopisu zamjenice ministra vanjskih poslova BiH vezanom za probleme u radu i funkcionisanju MVP-a BiH" pošto mišljenje iz Vijeća ministara nije stiglo u Komisiju.

Milica Marković je izrazila protest povodom dopisa koji je uputio Ministar vanjskih poslova BiH a povodom traženja mišljenja od Vijeća ministara. Kazala je da se dopis ministra vanjskih poslova suštinski razlikuje od dopisa zamjenice ministra, te dodala da se u dopisu ministra drži lekcija Komisiji za vanjske poslove Parlamentarne skupštine BiH i pokušava se da se Komisija i članovi Komisije disciplinuju u onom pravcu u kome želi da djeluje i funkcioniše Ministar vanjskih poslova. „Ja kao član Komisije to ne mogu prihvatiti i neću nikad pristati da radim pod takvim uslovima“, kazala je Milica Marković.

Slavko Matić je kazao da je dopis koji potpisuje Ministar vanjskih poslova dio nesporazuma, jer su predstavnici Ministarstva vanjskih poslova na posljednjoj sjednici otišli nakon skidanja tačke o dopisu zamjenice ministra vanjskih poslova sa dnevnog reda da bi se o toj tački ponovo govorilo pod tačkom tekuća pitanja. On je kazao da se formalno nije glasalo o zaključku i da je on sam mimo zaključka rekao da će uputiti dopis Vijeću ministara jer ne vidi da nam mišljenje Vijeća ministara može štetiti. U dopisu se spominje zaključak pa su gospoda iz Ministarstva vanjskih poslova s pravom reagirali.

Azra Hadžiahmetović je kazala da ima puno pravo da interveniše i dodala da smo prošli put prilikom usvajanja dnevnog reda skinuli tu tačku dnevnog reda. Zatražila je da se ne zloupotrebljava rasprava o dnevnom redu i uvodi rasprava o tački dnevnog reda sa prošle sjednice. Ona je dodala da će o ovome govoriti još pod tačkom dnevnog reda usvajanje zapisnika sa prošle sjednice, a da se sada zadržimo na dnevnom redu ove sjednice.

Sadik Ahmetović je predložio da Povjerenstvo zauzme stav povodom istupanja Ari Livnija, predstavnika Republike Srpske u Izraelu. Kazao je da je dotični gospodin na ružan način negirao državu Bosnu i Hercegovinu.

Milorad Živković je u vezi sa prijedlogom dnevnog reda i tačkom 4. gdje je navedeno ukoliko stigne dopis iz Vijeća ministara, kazao da mi nećemo moći pobjeći od te tačke dnevnog reda. Najjednostavniji način je da se ministar i zamjenica pozovu na sjednicu Komisije i da se onda rasprave međusobni nesporayumi.

Husein Nanić je kazao da misli da se gosti na sjednicama Povjerenstva ubuduće trebaju pozivati po pitanjima koja se njih tiču, s druge strane kazao je da ne vidi nikakav razlog da se Povjerenstvo za vanjske poslove bavi unutrašnjim odnosima unutar ministarstava i da je to prije nadležnost svih drugih Povjerenstava nego Povjerenstva za vanjske poslove.

Članovi Povjerenstva su se saglasili da se tačke 4. i 6. skinu sa dnevnog reda.

Azra Hadžiahmetović je povodom prijedloga Sadika Ahmetovića kazala da mi imamo našu ambasadu u Izraelu i zamolila u tom smislu i očitovanje Ministarstva vanjskih poslova u smislu angažmana naše ambasade u Izraelu i očitovanja povodom izjava koje je pomenuo Sadik Ahmetović.

Milorad Živković je kazao da nije dobro da ambasada ulazi u ocjenu ili prenos izjava bilo koga iz Bosne i Hercegovine. Ako ćemo tražiti izvještaj treba tražiti izvještaj o cjelokupnom stanju u Izraelu pa da raspravimo o čitavom problemu.

Milica Marković je kazala da je protiv toga da se Komisija izjašnjava i daje svoje stavove o bilo čijim izjavama bez obzira kog nivoa bili ti zvaničnici iz razloga što smo imali jednu situaciju prije godinu dana kada je većina u Komisiji tada konstatovala da Komisija nije nadležna da daje mišljenja o nečijim izjavama jer to postaje vrlo delikatna tendencija da ćemo upasti u zamku i pratiti razne izjave i davati svoja mišljenja što uopšte nije posao Komisije. A kao drugi razlog je navela da je ona prije godinu dana tražila kao član Komisije da se Komisija odredi o izjavama člana Predsjedništva Željka Komšića o njegovim raznim izjavama i tada je konstatovano da Komisija nije nadležna da daje mišljenja o bilo čijim izjavama.

Sadik Ahmetović je kazao da je Željko Komšić član Predsjedništva BiH i ima ustavno pravo da vodi vanjsku politiku. Dotični gospodin je predstavnik Republike Srpske u okviru

ekonomskih odnosa i on je izašao iz svog konteksta i ne ponaša se u skladu sa ustavom Bosne i Hercegovine.

Milica Marković je kazala da je Komisija zauzela generalan princip u pogledu takve vrste pojava koje se mogu dogoditi na zasjedanjima ove Komisije i da neće kao član Komisije glasati da pravimo izuzetke u zavisnosti od slučaja do slučaja. "Ako smo se tako dogovorili prije godinu dana ja tražim da se toga pridržavamo dok smo u ovom sastavu", dodala je Milica Marković.

Azra Hadžiahmetović je kazala da ne idemo u raspravi u dobrom pravcu. Dodala je da je Željko Komšić član Predsjedništva BiH kao i bilo koji drugi član i da ne zna kom institucionalnom okviru na ovom državnom nivou koje je u nadležnosti ove Komisije pripada osoba koja je dala pomenutu izjavu. Ona je pomenula da je maloprije pomenula da zatražimo stav ili očitovanje nadležnog ministarstva o eventualnim nastupima i izjavama ljudi izvan ovog institucionalnog sistema. Zamolila je da ne dovodimo u istu ravan nekoga ko nije dobio ovlaštenja nijedne od ovih institucija koje pominjemo i koje su u nadležnosti i angažmana ove Komisije, pogotovu da ih ne dovodimo u istu ravan sa članovima Predsjedništva BiH.

Milorad Živković je kazao da problem koji se javio u Gazi možemo gledati široko i predložio da tako i uradimo. Predložio je da tražimo informaciju od Ministarstva vanjskih poslova i ako treba da se traži zvaničan stav od Predsjedništva BiH koji je stav BiH u odnosu na taj sukob. "Kad dobijemo zvanični stav naše države u vezi sa tim pitanjem, moći ćemo da ulazimo u pojedina mišljenja ostalih u BiH u vezi sa tim pitanjem, pa ćemo govoriti onda i o tome šta je Mirnes Ajanović ili neko drugi govorio u vezi sa time", kazao je Milorad Živković.

Slavko Matić je povodom prijedloga Sadika Ahmetovića kazao da nemamo bilo kakav materijal povodom istupanja predstavnika Republike Srpske i sugerisao Sadiku Ahmetoviću da na sjednici Zastupničkog doma postavi zastupničko pitanje koje može usmjeriti ka Ministarstvu vanjskih poslova.

Podtačka izvještaj o posjeti Povjerenstva za vanjske poslove Zastupničkog doma PS BiH Hrvatskom saboru 30.11.- 02.12. 2008. godine je takođe skinuta sa dnevnog reda jer izvještaj nije bio završen do početka sjednice.

Za sjednicu Povjerenstva jednoglasno je usvojen sljedeći

DNEVNI RED

1. Usvajanje zapisnika sa 36. sjednice Povjerenstva;
2. Davanje mišljenja o suglasnosti za ratificiranje:
 - a) Sporazuma o suradnji u oblasti turizma između Vijeća ministara Bosne i Hercegovine i Hašemitske Kraljevine Jordan, (resorno ministarstvo: Ministarstvo vanjske trgovine i ekonomskih odnosa BiH);
 - b) Konvencije o zaštiti podvodne i kulturne baštine – *Pariz, 02.11. 2001. godine*, (resorno ministarstvo: Ministarstvo civilnih poslova BiH);

- c) Europske konvencije o zaštiti arheološke baštine (revidirana) iz 1992. godine, (resorno ministarstvo: Ministarstvo civilnih poslova BiH);
 - d) Okvirne konvencije Vijeća Europe o vrijednosti kulturne baštine za društvo – *Pariz, 27.10. 2005. godine*, (resorno ministarstvo: Ministarstvo civilnih poslova BiH);
 - e) Međunarodne konvencije protiv dopinga u sportu – *Pariz, 19.10. 2005. godine*, (resorno ministarstvo: Ministarstvo civilnih poslova BiH);
 - f) Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj kao Agencije za implementaciju sredstava Globalnog fonda za okoliš – Projekat upravljanja Neretvom i Trebišnjicom, (resorno ministarstvo: Ministarstvo finansija i trezora BiH);
3. Imenovanje člana koordinacionog tima za kandidaturu BiH u Vijeće sigurnosti UN-a;
 4. Rasprava o zaključcima zastupnika Bakira Izetbegovića, Denisa Bećirovića, Mirka Okolića i Milorada Živkovića povodom rasprave o izvješću o radu izaslanstva PS BiH u PS Vijeća Evrope u 2008. godini;
 5. Pismo predsjedavajućeg Narodnog sabora Republike Bugarske sa Završnom Deklaracijom regionalnog programa Bugarske političke škole – za informaciju (materijal MVP-a BiH);
 6. Informacija o sastanku Vijeća EU za opće poslove i vanjske odnose, 8. i 9. 12. 2008.godine u Briselu;
 7. Pismo Predsjednika Parlamenta Republike Grčke – za informaciju (materijal MVP-a BiH)
 8. Izvješća:
 - sa regionalnog okruglog stola " ODNOS IZMEĐU PARLAMENTA I JAVNIH REVIZORSKIH INSTITUCIJA ", Skoplje, 12. i 13. 12. 2008. godine;
 - sa službenog putovanja u Kuwait – učešće na Trećoj globalnoj konferenciji parlamentaraca o borbi protiv korupcije (17.- 20. novembar 2008. godine);
 - o službenom putu u Brisel i prisustvu seminaru "Pravo Evropske unije" 01.- 04. 12. 2008. godine;
 - s trećeg plenarnog zasjedanja Parlamentarne Skupštine Mediterana, Monako, 13-15. 11. 2008. godine.
11. Tekuća pitanja:
 - utvrđivanje termina za posjetu Povjerenstva za vanjske poslove Parlamentu Švicarske;
 - utvrđivanje termina za posjetu Povjerenstva za vanjske poslove Estonskom Parlamentu;
 - prijedlog termina za posjetu predsjedatelja Povjerenstva za vanjske poslove Islamskoj Republici Iran (u suradnji sa Kolegijem ZD PS BiH);
 - Prijedlog termina i utvrđivanje broja članova izaslanstva PS BiH za posjetu Kraljevini Maroko (u suradnji sa odjelom za međunarodne odnose i protokol PS BiH).

Ad. 1. Usvajanje zapisnika sa 36.sjednice Povjerenstva

Azra Hadžiahmetović je zamolila da se ubuduće poštuje praksa da se sve tačke dnevnog reda a koje se tiču rada Povjerenstva sadržajno budu orjentirane samo na članove Povjerenstva. Stoga je zamolila da ubuduće uvedemo praksu da predstavnici ministarstava koji su tu radi ratifikacije Sporazuma budu pozvani kada je ta tačka na dnevnom redu. Ona je predložila uz svo uvažavanje svih koji su prisutni da raspravu o zapisniku odgodimo za kasnije.

Članovi Povjerenstva su se saglasili da se prva tačka preskoči i da se na nju vratimo nakon davanja mišljenja o saglasnosti za ratifikaciju Sporazuma, i da se o svim ostalim tačkama koje su vezane isključivo za rad Povjerenstva raspravlja bez prisustva gostiju iz raznih ministarstava, koji tada nemaju potrebe da budu prisutni.

Slavko Matić je zamolio predstavnika Ministarstva vanjskih poslova da kaže da li je ispoštovana procedura kod potpisivanja svih Sporazuma i Konvencija.

Predstavnik Ministarstva vanjskih poslova Sead Avdić je kazao da je ispoštovana sva neophodna procedura.

Ad. 2. a) Davanje mišljenja o suglasnosti za ratificiranje Sporazuma o suradnji u oblasti turizma između Vijeća ministara Bosne i Hercegovine i Hašemitske Kraljevine Jordan

Arna Ugljen-Kopić iz Ministarstva vanjske trgovine i ekonomskih odnosa BiH je kazala da je Sporazum potpisao ministar Mladen Zirojević 29.10. 2008. godine u Amanu, Jordan i da se čeka ratifikacija sporazuma.

Nije bilo rasprave i članovi Povjerenstva su jednoglasno dali pozitivno mišljenje Predstavničkom domu u vezi ratifikacije ovog Sporazuma.

Ad. 2. b) Davanje mišljenja o suglasnosti za ratificiranje Konvencije o zaštiti podvodne i kulturne baštine – Pariz, 02.11. 2001. godine

Biljana Čamur iz Ministarstva civilnih poslova BiH je kazala da se radi o UNESCO-voj Konvenciji i da smo mi kao članica UNESCO-a pristupili aktivnostima na pristupanju Konvenciji koje se tiču oblasti kulturnog naslijeđa. Pristupanje BiH ovoj konvenciji pokazuje našu spremnost da primjeni međunarodne standarde u ovoj oblasti u našoj zemlji. Zakonodavstvo će nakon što BiH ratifikuje Konvenciju morati da uskladi propise sa preporukama ove konvencije, a prije svega one koje se odnose na zaštitu podvodne kulturne baštine, jačanje svijesti o vrijednosti podvodne kulturne baštine, razvijanje svijesti o važnosti istraživanja, informisanja i obrazovanja u ovoj oblasti.

Nije bilo rasprave. Članovi Povjerenstva su jednoglasno dali pozitivno mišljenje Predstavničkom domu u vezi sa ratifikacijom ove konvencije.

Ad. 2. c) Davanje mišljenja o suglasnosti za ratificiranje Europske konvencije o zaštiti arheološke baštine (revidirana) iz 1992. godine

Ad. 2. d) Davanje mišljenja o suglasnosti za ratificiranje okvirne konvencije Vijeća Evrope o vrijednosti kulturne baštine za društvo – Pariz, 27.10. 2005. godine

U vezi ove dvije konvencije Biljana Čamur je kazala da se radi o konvencijama Savjeta Evrope, gdje mi kao članica Savjeta Evrope pristupanjem ovim dvijema konvencijama pokazujemo da smo spremni da primijenimo evropske standarde u ovoj oblasti u Bosni i Hercegovini.

Nije bilo rasprave i članovi Povjerenstva su jednoglasno dali pozitivno mišljenje Predstavničkom domu u vezi sa ratifikacijom ove dvije konvencije.

Ad. 2. e) Davanje mišljenja o suglasnosti za ratificiranje Međunarodne konvencije protiv dopinga u sportu – Pariz, 19.10. 2005. godine

Suad Džafić iz Ministarstva civilnih poslova je kazao da su razlozi zbog kojih se pristupa Međunarodnoj konvenciji protiv dopinga u sportu podsticanje i sprečavanje u borbi protiv korištenja dopinga u sportu, podsticanje svih oblika međunarodne saradnje čija je svrha zaštita sportista i sportskog morala, uzajamna tehnička i naučna pomoć, međunarodna saradnja u dopinškoj kontroli, prikupljanje širih naučnih informacija i utvrđivanje vlastitih standarda u borbi protiv dopinga u sportu.

Nije bilo rasprave i članovi Povjerenstva su jednoglasno dali pozitivno mišljenje Predstavničkom domu u vezi sa ratifikacijom ove konvencije.

Ad. 2. f) Davanje mišljenja o suglasnosti za ratificiranje Sporazuma o grantu Globalnog fonda za okoliš između Bosne i Hercegovine i Međunarodne banke za obnovu i razvoj kao Agencije za implementaciju sredstava Globalnog fonda za okoliš – Projekat upravljanja Neretvom i Trebišnjicom

Bejta Ramović iz Ministarstva finansija i trezora BiH je kazala da se radi o ekološkom projektu koji ima za cilj unapređenje vodnih resursa u slivovima Neretve i Trebišnjice, unapređenje eko sistema i biodiverziteta u navedenim slivovima. Prijekat traje pet godina, vrijednost nepovratnih sredstava, odnosno granta je šest miliona koji se dijeli na entitete, Federaciji BiH dva i po miliona, Republici Srpskoj milion i osamsto, a milion i sedamsto će implementirati Ministarstvo vanjske trgovine ali na određenu lokaciju u korist entiteta.

Nije bilo rasprave. Povjerenstvo je jednoglasno dala pozitivno mišljenje Predstavničkom domu u vezi sa ratifikacijom Sporazuma.

Ad. 3. Imenovanje člana Koordinacionog tima za kandidaturu BiH u Vijeće sigurnosti UN-a

Predsjedavajući Povjerenstva Slavko Matić je kazao da je u vezi sa ovom tačkom dostavljen dopis iz Ministarstva vanjskih poslova BiH. Pozvao je Seada Avdića da, ukoliko ima potrebe, ispred Ministarstva iznese dodatne informacije u vezi sa imenovanjem člana Koordinacionog tima.

Sead Avdić je podsjetio da je na prošloj sjednici Povjerenstvo obaviješteno da je ambasador Prica preuzeo ulogu koordinatora Tima. To je, ustvari, planiranje i realizacija obaveza koje stoje pred BiH. Radi se o jednom od najvažnijih projekata u pripremi za prijem BiH u Vijeće sigurnosti Ujedinjenih nacija 2010-2011. godine., rekao je, uz ostalo, Sead Avdić.

Milorad Živković je obavijestio Komisiju da je o ovom pitanju raspravljao Zajednički kolegij oba doma Parlamentarne skupštine BiH i da je imenovao Zlatka Lagumdžiju. Zapitao je da li se sad radi o tome da i Povjerenstvo treba da imenuje nekog člana, ili je potrebno da se ispred Parlamenta imenuje samo jedan čovjek.

Predsjedavajući Matić je rekao da tek sada čuje da je o ovom pitanju raspravljao i Zajednički kolegij i da je dao svoj prijedlog. Ako je tako, ne ostaje ništa drugo nego da Povjerenstvo taj prijedlog primi k znanju i konstatuje da je u Koordinacioni tim imenovan Zlatko Lagumdžija.

Husein Nanić je rekao da misli da bi bilo dobro da, kad su u pitanju ovakva pitanja, Povjerenstvo za vanjske poslove ima aktivniju ulogu. Podsjetio je da je on i ranije više puta diskutovao u vezi sa određivanjem raznih putovanja u inostranstvo po raznim osnovima i da se Povjerenstvo za vanjske poslove nalazi u vrlo inferiornom položaju. Zbog toga je izrazio svoje nezadovoljstvo načinom i odnosom prema Komisiji za vanjske poslove. Povjerenstvo i u svom opisu

nadležnosti ima vanjske poslove, pa najmanje što se moglo, jeste da je u Koordinacioni tim trebalo imenovati predsjedavajućeg ili nekog člana Povjerenstva. "Mislim da zbog ozbiljnosti ovog posla treba predložiti više imena", rekao je, pored ostalog, Husein Nanić.

Milica Marković je kazala da Povjerenstvo treba da podrži to što je Zajednički kolegij predložio, kad je već to tako urađeno, te da je suvišno o tome voditi bilo kakvu raspravu. Što se tiče kompetencija o čemu je Nanić govorio, kazala je da misli da će Povjerenstvo zapasti i u teže situacije, jer se dešava da se od Povjerenstva traži nešto što nije potrebno, pa da misli da je i ovo greška Ministarstva vanjskih poslova što je tražilo od Povjerenstva da imenuje člana Koordinacionog tima.

Azra Hadžiahmetović je kazala da Povjerenstvo treba konstatovati da Ministarstvo vanjskih poslova nije znalo za aktivnosti Zajedničkog kolegija na ovom pitanju, budući da je danas dostavilo ovaj dopis. Zato ne zna šta je greška Ministarstva, jer ne vjeruje da bi Ministarstvo uputilo ovakav dopis da je znalo za prijedlog Kolegija. Podsjetila je na raspravu na prošloj sjednici, što se vidi i u Zapisniku, da je predsjedavajući pitao da li to treba biti predstavnik Parlamentarne skupštine BiH. Ako jeste, onda to treba predložiti Zajednički kolegij, a ako treba član Povjerenstva, onda o tome treba raspravljati Povjerenstvo. Dodala je da cijeni da je Zajednički kolegij ispravno uradio posao, te da se radi o nesporazumu na relaciji Zajednički kolegij – Ministarstvo vanjskih poslova BiH.

Milorad Živković je rekao da je Zajednički kolegij 12. januara na sjednici imao na dnevnom redu zahtjev Ministarstva vanjskih poslova BiH i da misli da je iz PS BiH blagovremeno otišlo obavještenje.

Senad Avdić je rekao da MVP BiH nije dobilo obavještenje da je Zajednički kolegij imenovao člana, inače da jeste, ne bi bilo potrebe da se ponovo dostavlja zahtjev Komisiji.

Milorad Živković je, nakon provjere, rekao da je tačno da Ministarstvo vanjskih poslova BiH nije dobilo obavještenje o imenovanju člana Koordinacionog tima, jer predsjedavajući doma naroda Mladen Ivanić još nije potpisao odluku Zajedničkog kolegija.

Predsjedavajući Matić je rekao da nema potrebe da se dalje raspravlja o ovom pitanju. Predložio je da Povjerenstvo konstatuje da je član Kolegija Predstavničkog doma Milorad Živković u raspravi informisao Komisiju da je Zajednički kolegij oba doma imenovao Zlatka Lagumdžiju u Koordinacioni tim, da Povjerenstvo za vanjske poslove podržava prijedlog Zajedničkog kolegija, o čemu će se obavijestiti Kolegij Zastupničkog doma i Ministarstvo vanjskih poslova BiH.

Još su u vezi s imenovanjem Zlatka Lagumdžije raspravljali Husein Nanić, Azra Alajbegović, Milorad Živković, Azra Hadžiahmetović i predsjedavajući Matić.

Nakon rasprave, predsjedavajući Matić je predložio da povodom ove tačke bude zaključak – da je Povjerenstvo primilo k znanju informaciju da je Zajednički kolegij oba doma izvršio imenovanje Zlatka Lagumdžije za člana Koordinacionog tima za kandidaturu BiH u Vijeće sigurnosti UN-a.

Nakon rasprave o imenovanju člana Koordinacionog tima članovi Povjerenstva su se vratili **na usvajanje Zapisnika sa 36. sjednice Povjerenstva.**

Azra Hadžiahmetović je kazala da je zapisnik autentično odrazio sve ono što se događalo na radnom dijelu sastanka, i da će glasati za usvajanje zapisnika, ali je povodom zapisnika zapitala

da li ćemo uvesti praksu u Komisiji da se pod tekućim pitanjima ponovo vraćamo na neku tačku koja je ranije skinuta sa dnevnog reda. Hoćemo li uvesti praksu da član Povjerenstva ili član Kolegija, uključujući i predsjednika Komisije, samostalno povuče neki potez iako smo se saglasili da ta tačka dnevnog reda nije na dnevnom redu sjednice Povjerenstva, jer oko toga nismo imali nikakav zajednički stav. Ako je predsjednik Povjerenstva imao pravo da uputi dopis predsjedavajućem Vijeća ministara BiH onda je to uradio samostalno, neovisno od Povjerenstva. Dodala je da ovo govori iz najbolje namjere i da smo na prošloj sjednici mogli ući u problem samom formulacijom tačke dnevnog reda – „stanje u Ministarstvu vanjskih poslova“. Mi za raspravu na ovoj Komisiji nismo imali nikakav drugi materijal osim dopisa zamjenice ministra vanjskih poslova, što je moglo ovu Komisiju i Parlament a i stanje u MVP-u dovesti u još težu poziciju. Ona je napomenula da je i na prošloj sjednici između ostalog kazala da, ako ćemo raspravljati o stanju u Ministarstvu, dobijemo izvještaj o radu Ministarstva vanjskih poslova, i da o tome raspravljamo uz prisustvo i ministra i zamjenika ministra. Izrazila je nezadovoljstvo potezom koji po njoj nema nikakvu logiku. Dopis je upućen i Vijeću ministara i Parlamentarnoj skupštini. Istaknula je da nema nikakve logike da Parlamentarna skupština traži od Vijeća ministara stav o tome jer je o tome stav mogao zauzeti predsjedavajući Vijeća ministara ukoliko je to smatrao za potrebno. Kazala je da je ovde napravljen i proceduralni i sadržajni propust i da svakako to nije potez koji bi mogao doprinijeti eventualnom rješenju problema u Ministarstvu vanjskih poslova o kojem mi nismo obavili raspravu. Predložila je da, ukoliko treba raspravljati o tome, tražimo izvještaj o radu u Ministarstvu vanjskih poslova, uvrstimo tačku dnevnog reda - Izvještaj o radu Ministarstva vanjskih poslova, da to ne bude samo formalna rasprava o samom izvještaju o radu jer smo u međuvremenu imali dopis ove vrste, i da pozovemo ministra i zamjenika da eventualno raspravljamo i o stanju u Ministarstvu vanjskih poslova. Rasprava svake druge vrste bi nas dovela na pogrešan put, kazala je, pored ostalog, Azra Hadžiahmetović.

Milorad Živković je rekao da se slaže da povodom tačke dnevnog reda o zapisniku usvojimo zaključak da Ministarstvo spoljnih poslova za iduću sjednicu Povjerenstva podnese izvještaj o svom radu, i da pozovemo ministra i zamjenicu da taj izvještaj obrazlože.

Husein Nanić je povodom dijela u zapisniku gdje se govori da su članovi Povjerenstva veoma često istovremeno govorili, kazao da ubuduće povedemo računa o tome da ne bi došli u situaciju da se ne može izvući zaključak iz rasprave. Dodao je da se slaže sa Azrom Hadžiahmetović da se uvede drugačiji način rada, da gosti prisustvuju tokom rasprave o tačkama dnevnog reda koje se tiču njih, a kad se raspravlja o drugim stvarima, kao što je zapisnik i sl., da nema potrebe da prisustvuju gosti sjednice.

Milorad Živković je kazao da je poslovnički riješeno da su sjednice svih Povjerenstava otvorene, na tim sjednicama mogu svi da prisustvuju od novinara do gostiju, i jedino ako se mi dogovorimo da ćemo držati zatvorene sjednice možemo izglasati da će sjednice biti zatvorene.

Milica Marković je rekla da se slaže sa konstatacijom Azre Hadžiahmetović da su prekršeni formalni principi u radu ove Komisije, jer ako smo se dogovorili da se neka tačka skida sa dnevnog reda onda nema smisla da se ta tačka ponovo potencira i aktuelizuje u nekom drugom dijelu sjednice. Kazala je da je ovdje evidentno prekršen taj formalni princip o radu Povjerenstva. Dodala je da podržava prijedlog da se za iduću sjednicu Povjerenstva traži da se dostavi izvještaj o radu Ministarstva inostranih poslova i da Povjerenstvo vodi raspravu o tome.

Slavko Matić je ponovio da je kazao da je napravljena formalna i proceduralna pogreška i podsjetio zašto je bio da se o tome raspravi pod tačkom „tekća pitanja“. Kazao je da je postojala mogućnost da i na narednoj sjednici Povjerenstva imamo zahtjev da ovo bude tačka dnevnog reda pa je zbog toga bio zagovornik donošenja zaključka da se zatraži stav Vijeća ministara i da

se osigura nazočnost i ministra i zamjenice ako budemo to razmatrali. I tada to niko od učesnika u raspravi nije osporio, ali je bilo protivljenja da se pod tekućim pitanjima to zaključuje. Dodao je da to na sjednici nije ni zaključeno, niti to stoji u Zapisniku, ali da je on konstatovao da on kao predsjedatelj može zatražiti stav Vijeća ministara u cilju pripreme za raspravu na narednoj sjednici.

Azra Hadžiahmetović je izrazila žaljenje zbog proceduralne pogreške na prošloj sjednici i predložila ponovo da prvo dobijemo izvještaj o radu Ministarstva vanjskih poslova i da na sastanku, kad se o tome bude raspravljalo, budu prisutni i ministar i zamjenik ministra. Kazala je da to može biti prilika da i ova Komisija i Ministarstvo vanjskih poslova prevaziđu neke probleme kako unutar ministarstva tako i na relaciji Parlament – Vijeće ministara.

Husein Nanić je radi korektnosti rekao da je ono što je predsjedavajući kazao zaista bilo odraz rasprave pri kraju prošle sjednice.

U vezi sa ovim članovi Povjerenstva su jednoglasno usvojili zaključak da Povjerenstvo traži izvješće o radu Ministarstva vanjskih poslova za 2008. godinu. Po dobijanju izvješća i osiguranom prisustvu i ministra i zamjenice ministra Povjerenstvo će staviti na razmatranje stanje i problematiku u funkcioniranju Ministarstva vanjskih poslova, a temeljem izvješća o radu za 2008. godinu.

Poslije usvajanja ovog zaključka, članovi Povjerenstva su jednoglasno usvojili zapisnik sa 36. sjednice Povjerenstva.

Ad. 4. Rasprava o zaključcima zastupnika Bakira Izetbegovića, Denisa Bećirovića, Mirka Okolića i Milorada Živkovića povodom rasprave o izvješću o radu izaslanstva PS BiH u PS Vijeća Evrope u 2008. godini

Predsjedavajući Povjerenstva je napomenuo da su uz poziv za sjednicu dobili prijedloge zaključaka.

Milorad Živković je iznio prijedlog zaključaka koje je sačinio na osnovu zaključaka koje su poslanici predložili povodom rasprave o Izvješćaju o radu Izaslanstva PSBiH u PS Vijeća Evrope u 2008. godini.

Nakon rasprave, u kojoj su učestvovali svi članovi Povjerenstva, Povjerenstvo je usvojilo prijedlog sljedećih zaključaka:

1. Zastupnički dom Parlamentarne skupštine BiH se upoznao sa Rezolucijom 1626 Vijeća Evrope i nastaviće raditi na ispunjavanju obveza na putu ka Europskoj uniji koje su navedene u ovoj rezoluciji.
2. Zadužuje se Izaslanstvo Parlamentarne skupštine BiH u Parlamentarnoj skupštini Vijeća Evrope da obvezno nazoči sjednicama komiteta na plenarnim zasjedanjima, a da u plan svoga rada za 2009. godinu uvrsti spisak aktivnosti tokom sjednica u pojedinim komitetima izvan plenarnih zasjedanja za svakog člana Izaslanstva pojedinačno.
3. Zastupnički dom Parlamentarne skupštine BiH apelira na Ministarstvo vanjskih poslova BiH, Vijeće ministara BiH i Predsjedništvo BiH da učine dodatni napor u ispunjavanju postprijemnih obveza Vijeća Evrope svako iz svog domena.
4. Poziva se Predsjedništvo BiH da žurno izvrši imenovanja na upražnjena mjesta predstavnika BiH pri Vijeću Evrope: Venecijanska komisija, Europska komisija protiv rasizma i netolerancije, Vijeće komiteta okvirne konvencije za zaštitu

nacionalnih manjina, Europski komitet za sprečavanje mučenja i nehumanog postupanja.

5. Zastupnički dom Parlamentarne skupštine BiH traži od Vijeća ministara BiH i Predsjedništva BiH da se što je moguće prije u parlamentarnu proceduru uputi prijedlog za ratificiranje Europske povelje o regionalnim i manjinskim jezicima.
6. Zadužuje se Vijeće ministara BiH da najkasnije u roku od 30 dana dostavi Zastupničkom domu Parlamentarne skupštine Bosne i Hercegovine operativni plan realizacije stavova Rezolucije 1626 Vijeća Europe – poštivanje dužnosti i obveza od strane BiH, kao i Preporuke 1843, u kojima se traže ozbiljne reforme na putu BiH u Europsku uniju.
7. Zadužuje se ministar vanjskih poslova BiH da, u svojstvu člana Komiteta ministara Vijeća Europe, izvijesti Parlamentarnu skupštinu BiH u kojem stadiju je implementacija Preporuke 1843, stava 2.3., kojim se Komitet ministara Vijeća Europe obvezuje surađivati sa vlastima BiH na izradi akcionog plana kojim bi se razvili novi ciljani programi suradnje Vijeća Europe i BH vlasti.

Ad. 5. Pismo predsjedavajućeg Narodnog sabora Republike Bugarske sa Završnom Deklaracijom regionalnog programa Bugarske političke škole – za informaciju (materijal MVP-a BiH)

Ad. 6. Informacija o sastanku Vijeća EU za opće poslove i vanjske odnose, 8. i 9. 12. 2008.godine u Briselu

Ad. 7. Pismo Predsjednika Parlamenta Republike Grčke – za informaciju (materijal MVP-a BiH)

Ad. 8. Izvješća:

- sa regionalnog okruglog stola " ODNOS IZMEĐU PARLAMENTA I JAVNIH REVIZORSKIH INSTITUCIJA ", Skoplje, 12. i 13. 12. 2008. godine;
- sa službenog putovanja u Kuwait – učešće na Trećoj globalnoj konferenciji parlamentaraca o borbi protiv korupcije (17.- 20. novembar 2008. godine);
- o službenom putu u Brisel i prisustvu seminaru "Pravo Evropske unije" 01.- 04. 12. 2008. godine;
- s trećeg plenarnog zasjedanja Parlamentarne Skupštine Mediterana, Monako, 13.- 15. 11. 2008. godine.

Komisija je primila k znanju informacije i izvješća iz tačaka 5. 6. 7. i 8. dnevnog reda.

Ad. 9. Tekuća pitanja:

- utvrđivanje termina za posjetu Povjerenstva za vanjske poslove Parlamentu Švicarske;
- utvrđivanje termina za posjetu Povjerenstva za vanjske poslove Estonskom Parlamentu;
- prijedlog termina za posjetu predsjedatelja Povjerenstva za vanjske poslove Islamskoj Republici Iran (u suradnji sa Kolegijem ZD PS BiH);
- Prijedlog termina i utvrđivanje broja članova izaslanstva PS BiH za posjetu Kraljevini Maroko (u suradnji sa odjelom za međunarodne odnose i protokol PS BiH).

Sekretar Povjerenstva Merdžana Iglica upoznala je Komisiju o pristiglim pozivima Komisiji da izvrši posjete na destinacije navedene pod tačkom „Tekuća pitanja“.

Milorad Živković je skrenuo pažnju da je Kolegij napravio kalendar zasjedanja Doma za prva četiri mjeseca, pa bi trebalo voditi računa o terminima zasjedanja Doma, jer se u to vrijeme neće dozvoliti posjete.

Nakon diskusije Slavko Matić je prijedložio da posjeta Povjerenstva švicarskom parlamentu bude u zadnjem tjednu drugog mjeseca, estonskom parlamentu u zadnjem tjednu trećeg mjeseca, a da na narednoj sjednici razgovaramo o ostala dva prijedloga za posjetu Islamskoj Republici Iran i Kraljevini Maroko. A da prije nego se konačno odlučimo u kom sastavu i kom broju bi išli u posjetu, da dobijemo zvanični stav Kolegija i dopuštenje za prve dvije posjete.

Husein Nanić je kazao da bi se u dopisu Kolegiju trebale objasniti neke stvari da se zna šta su čije obaveze.

Slavko Matić se na kraju zahvalio članovima Komisije.

Sjednica je završena u 13.00 sati.

Zapisnik sačinio:

Miroslav Stanišić, stručni saradnik u Komisiji za vanjske poslove.

Sekretar Povjerenstva

Merdžana Iglica

Predsjedavajući

Slavko Matić

Kopija MVP-u BiH